

Oz è Numnasontga u il Di da las olmas



NOVEMBER

Numnasontga ed il Di da las olmas

Ils blers dis spezials datti per far attent ad insatge viv sco per exempel il Di dal giat u il Di dal chaun. Il 1. ed ils 2 da november è quai in pau auter, quels dis pensain nus a tut ils chars umans ch'èn gia morts.


Numnasontga, il 1. da november è in di religius da la Baselia catolica per festivar e pensar a tut ils sontgs. Perquai che quel di è er in firà e tschertas persunas han liber, van ellas baiduras gia quel di sin santeri per visitar las fossas da parents u d'amias e d'amis ch'èn gia morts.

En la religiun cristiana crain ins ch'ils umans hajan in'olma, damai ch'els sajan dapli ch'in corp. L'olma è quai che fa unic mintg'uman, co ch'el senta e pensa. En il cristianissem crain ins che l'olma giaja enta parvis, cura ch'in uman mora. Perquai è ils 2 da november il «Di da las olmas» e lura, u gia in di avant, mett'ins flurs u chandailas sin la fossa dad ina persuna morta.

Questa tradiziun dal sa regurdar dals morts e da lur olmas datti er en blers auters pajais sin quest mund. Ma i n'è betg dapertut insatge trist. En il Mexico per exempel ha quel di num

«Día de los Muertos» ed igl è in di da festa plain colurs. Las Mexicanas ed ils Mexicans crain ch'ils morts returnian quel di a chasa per visitar lur famiglias. Perquai decoreschan els las chasas e las fossas cun flurs da palpigi en tut las colurs. I dat dultscharias en furma da chavazzas u skelets ed ils umans rian, sautan e raquantan da las persunas ch'èn mortas.


Per las Mexicanas ed ils Mexicans n'è la mort betg insatge sgarschivel, mabain ina part da la vita. Perquai festiveschan els il Di dals morts u il Di da las olmas sco gronda festa plain legria.



Has ti gia udì dal «Di da las olmas» u dal «Día de los Muertos»?

Ideas per sa regurdar e render onur als morts

1



Fa in bel maletg
cun colurs d'aua.

Guarda in album da fotografias vegl,
nua che ti chattas fotografias da
las persunas che n'èn betg pli tar nus.

Scriva ina carta u ina poesia.

Raquinta ad insatgi da tia famiglia ch'è
pli giuven che ti dad in parent che na
viva betg pli.


Fa in dessert u insatge auter da mangiar
che la persuna morta aveva gugent u
che tutga tar vossa tradiziun da famiglia.

Fa ina visita sin santeri

2

Es ti già stada u stà ina giada sin santeri? In santeri è in lieu spezial. Ins di ch'ìls morts chattian qua lur ruaus, damai èsi da star fitg quiet sin santeri. Quai ha da far era cun il respect visavi ils confamigliars ed amis che visitan las fossas. Ti vegns

a sentir – sin santeri regna in'atmosfera fitg speziala. Ins na sto betg avair tema, ma tuttina èsi meglier da visitar in santeri ensemen cun ina persuna creschida. Cun la persuna creschida pos ti discutir las dumondas sutvart e tut quai che ta vegn endament areguard il tema vita e mort durant vossa visita sin santeri.



Datti ina fossa dad in parent sin il santeri?

Tschertga la pli bella fossa sin il santeri.

Guarda las datas sin ils craps da fossas. Cura èn las persunas naschidas? Cura èn ellas mortas?

Tge crais ti: Co han ellas vivì?

Decorescha ina chandaila da morts

3

Ti dovras:

- ina chandaila da morts senza decoraziuns
- colurs per malegiar sin vaider u fieuters permanents
- tatgaders permanents
- auter material da decoraziun sco bindels da colur, curals, plimas, etc.

Ponderescha per tgi che ti vuls decorar la chandaila da morts. Tgeninas eran las colurs preferidas da questa persuna? Ha questa persuna gì in animal da chasa u in hobi spezial? Malegia insatge che va a prà cun la persuna. Fa l'emprim ina skizza sin palpìri e malegia pir sunter sin il cup da la chandaila. Decorescha la chandaila cun bindels da colur u tatga si auter material da decoraziun. Sche ti vuls decorar ina chandaila da morts per ina persuna che ti n'enconuschevas betg, ta metta simplamain avant tge che quella persuna pudess avoir gì gugent. Ti pos era malegiar simbols sco cors, stailas u cruschs. Porta la chandaila sin santeri e plazzescha ella sin fossa.

